

Jutros, u cik zore je u naselju Kruščica kod Viteza specijalna policija na silu rastjerala demonstrante od kojih je nekoliko završilo sa ozbiljnim povredama. Demonstranti nisu pružali otpor niti su provocirali, ali bez obzira na to policija je reagovala fizičkim uklanjanjem demonstranata te na taj način obezbijedila prolaz građevinskim mašinama preko mosta. Nakon uklanjanja demonstranata, mnogi su privedeni i nad njima se provodi kriminalistička obrada a dosta njih se obratilo u ambulantu radi liječničke pomoći. Podsjećamo da se građanke i građani Kruščice već oko mjesec dana mirnim okupljanjem bore protiv početka gradnje MHE Kruščica 1, čija se lokacija nalazi na području planiranog Parka prirode Kruščica a ovakve građanske inicijative se dešavaju i u drugim dijelovima BiH kao što je opština Kotor Varoš ili Fojnica od prije nekoliko godina.

Ovo je još jedan dokaz da građanke i građani Bosne i Hercegovine nisu zaštićeni od strane institucija te da je moguće da se ovakvi monstruozi događaji mogu desiti čak ženama i djeci. Mještani Kruščice brane svoje pravo na zdravu životnu sredinu i pravo na vodu, kao njihovo osnovno ljudsko pravo dok investitorima i onima koji štite njihove interese osnovni motiv je isključivo profit. Očigledno je da je privatni iznad javnog interesa što su najnovija dešavanja u Kruščici pokazala pa i time da se sve dešavalo prije 5 sati ujutro za šta su angažovane specijalne policijske jedinice koje finansiraju građanke i građani ove države. Ako je u pitanju deblokada putne komunikacije, zašto se investitor sa mašinama našao odmah iza leđa policije i prešao most koji je osnovna komunikacija za prolazak do lokaliteta na kojem žele da grade MHE čim su demonstranti fizički "premješteni"? Ovo je za svaku osudu i čin je protiv čovječnosti i građana Bosne i Hercegovine kako bi se zaštitili oni koji donose i sprovode štetne odluke po životnu sredinu i ljude.

Koalicija za zaštitu rijeka Bosne i Hercegovine će se obratiti za pomoć kolegama iz cijele Bosne i Hercegovine i regiona, te ćemo se obratiti Evropskom sudu za ljudska prava jer ovo je očigledno kršenje prava na javno okupljanje, izražavanje mišljenja i prava na život dostojan čovjeka. Ovaj slučaj ćemo iznijeti kao primjer progona aktivista za zaštitu životne sredine na nadolazećoj konferenciji u Budvi, gdje će se održati sastanak Potpisnica Arhuske konvencije prema kojoj vlasti trebaju da zaštite svoje građane od bilo kakvog progona, izjavio je Viktor Bjelić ispred Koalicije za zaštitu rijeka Bosne i Hercegovine.

Izvor: czzs